

Retrospectiva; Lö d'inscunter Chasa Fliana Lavin 2025

Dond ün sguard inavo süls referats e'ls cuors dals 21 october fin als 9 december 2025, pudaina dir cun plaschair chi'd es stat ün temp fich infuormativ ed allegraivel.

Tuot ils referents , cun lur möd ingaschè e bain preparà, fascineschan mincha mardi ad üna sala plain glieud. Pro minchün / a as bada la paschiun ch'el / la resainta per sia lavur e seis manster. Ils manaders dals cuors sun preschaints, fich motivats e cun grond ingaschamaint.

68 participants:as s'han annunzchats:das pels cuors. Diversa glieud ha tut part be als referats , tuot tenor l'interess.

Ils blers rivan cul tren a Lavin, sü da l'Engiadina Bassa, giò da l'Engiadin'Ota ed eir sur il Pass dal Fuorn nan da la Val Müstair. Be pacs rivan a Lavin, chi'd es situà fich central, cul auto privat.

Tuots s'inscuntran e's radunan avant las 9.00h a bunura, ill'entrada da la sala polivalenta. Ün bel mumaint per as salüdar, brattar novitats ed approfondir las amicizchas.

Intant es il team da la società, al lö d'inscunter, fingià bundant ün'ura vi da la lavur. Las duonnas preparan la sala cun tuot ils indrizs electronics, per cha tuot funcziuna perfettamaing. Il caffè e'ls stortins sun bain parderts per la posa.

Las 9.15h vain rivida la sala, tuot ils giasts chi vegnan be pel referat pajan 10.- frs entrada.

Las bunuras cumainzan cun üna meditaziun, ün' istorgia, üna sumaglia o üna poesia. Quella meditaziun es tschernüda tenor il tema dal referat.

Il prüm referat fich fascinant cha no pudain gioldair ils 21 october, es quel da Susanna Fanzun. Ella quinta sur da sia lavur sco cineasta e sia paschiun per istorgias localas cun temas globals ed eir chenünas sfidas chi dà per crear ün film.

Impreschiunant es eir il referat da Graziella Ramponi sur da sia lavur in Thailandia. Insembel cun ün'amia ha'la fabrichà sü la chasa d'orfens " Baan Doi ". Quai chi ha cumanzà cun trais uffants es hoz üna chasa d'abitar, da scolaziun e da lavur per 47 uffants e giuvenils. Lapro tocca eir üna paura biologica, ingio cha'ls giuvenils as pon svilupar.

La lavur e las retscherchas per seis cudesch sur da l'hotel da cura Val Sinestra da Michael Ludolphi es il terz referat. Quel ha motivà a diversa gieud dals contuorns da gnir a tadar. Tuot la documainta per la realisaziun dal cudesch, ha'l chattà in üna stanza sün charpenna da l'hotel. Il cuort film ch'el ans muossa our dal on 1955 , fa grond'impreschiun a tuot ils preschaints.

Fich actual es la fascinaziun pel Maraton da Skis Engiadinais: Istorgia, cifras e chenünas chi sun las grondas sfidas per organisar uschè ün evenimaint gnina a savair cul referat da Men Duri Kasper.

La Tessanda Val Müstair ans preschainta Maya Rapele in seis referat. Ella ans quinta da las sfidas in üna chasa veglia chi dovress renovaziuns, da la lavur tradiziunala ed unica in nos chantun, mo eir dad ün grond proget pel avegnir.

Hans Lozza, biolog e collavuratur dal PNS, ans quinta da sias experienzas persunalas aint il reservat da la natüra. El muossa eir purtrets da sias observaziuns illas differentas valladas dal Parc Naziunal Svizzer. El preschainta seis cudesch “Fascinaziun PNS”, cun bellischmas fotografias.

Il silvicultur dal cumün da Scuol, Antonin Hugentobler, declera la lavur dals silviculturs dūrant las quatter stagiuns. Implü sun lavinas, boudas, vents mo eir il magliascorza temas chi til occupan. Perquai è'l respunsabel per la chüra dals gods da protecziun, per repars da lavinas ed oter plü. Interessant es eir la scolaziun cun seis chan per cha quel chatta il magliascorza.

La prelecziun d'Advent da Richard Schnell ans quinta ün' istorgia cun plets e mimica, chi riva pro'ls aspectaturs e passa sco ün film speravia.

Pro mincha referat tocca la posa da caffè, davo lura la discussiun e dumondas al referent.

Il giantar da cumpagnia ha lö illa sala da la Chasa Fliana. Da giantar daja üna schoppa e l'ultim di ün bun toc pizza dal fuorn ed ün büfè da salata.

Il giantar da cumünanza es ün bel mumaint per s'inscuntrar, brattar ideas, plaschairs e pissers. Blers giodan eir d'avair ün müdamaint dal minchadi.

Las lavurs dals cuors vegnan expostas l'ultim avantmezdi illa sala polivalenta. Quistas lavurs fich bellas vegnan fattas dūrant ils davomezdis i'ls differentes cuors. Uschè i'ls cuors **Atelier dad aquarel** cun Ursina Ganzoni, **Lavurs a man** (far culs spaits e cul crötsch) cun Claudia Schlumpf, **Fioutrar** cun Cornelia Balz, **Cuors creativ** decoraziuns e cranzs our da materials natürals cun Bigi Kohl.

Eir il cuors **Teater liber** cun Annina Sedlacek ha gnü lö. Quella gruppa ha preschantà lur clownarias il davomezdi d'Advent illa sala Fliana. Cun movimaints improvisats, cun gests e mimicas hana diverti a tuot ils preschaints in sala.

Ils partecipants dal cuors **Giovar a schach** cun Andri Luzi, ans muossan tuot las figüras e las sfidas da quist gö in möd umoristic.

Ils amis da **la tschinquina**, chi giovan quist gö da chartas cun gronda paschiun cun Silvia Steiner, tradischan ün pêr passadas our da lur cuors.

In buna atmosfera e bain gratiats sun its a fin ils cuors e'ls referats 2025. Ün program varià e fich bain gratià.